



**COMHAIRLE AN
AONTAIS EORPAIGH**

**Lucsamburg, an 21 Deireadh Fómhair 2013
(OR. fr)**

SN 14650/13

**COAFR 312
COHAFA 111
PESC 1208
COHOM 229
ACP 158**

NÓTA

ó:	Ardrúnaíocht na Comhairle
chuig:	Na Toscaireachtaí
Ábhar:	Conclúidí ón gComhairle maidir le Poblacht na hAfraice Láir

Ag an gcruinniú a bhí ag an gComhairle an 21 Deireadh Fómhair 2013, ghlac sí na Conclúidí ón gComhairle a leagtar amach san Iarscríbhinn a ghabhann leis an nóta seo.

Conclúidí ón gComhairle maidir le Poblacht na hAfraice Láir

1. Is cúis mhór imní don Aontas Eorpach (AE) an staid mar atá i bPoblacht na hAfraice Láir (PAL), áit ina bhfuil an pobal sibhialtach, go háirithe na leanaí, arb iad an grúpa is leochailí iad, thíos le sáruithe tromchúiseacha ar chearta an duine mar thoradh ar an easlándáil agus de bhrí go bhfuil an beartas poiblí tite as a chéile ar fad. Tá an staid dhaonnúil scáfar: meastar go bhfuil an pobal ina iomláine i mbaol mór.
2. Tacaíonn AE le gníomhaíocht chinntitheach an Aontais Afracaigh (AA) agus Chomhphobal Eacnamaíoch Stáit Lár na hAfraice (ECCAS) agus le hidirghabháil réigiúnach d'fhonn tús áite a thabhairt d'iarrachtaí chun cuidiú le PAL a chobhsú, ar tír í atá lonnaithe i gcroílár an-chuid limistéar atá meathlaithe de bharr na géarchéime nó na coinbhleachta atá ar siúl le blianta beaga anuas, de bharr na póitseála, de bharr na ngrúpaí armtha iasachta a bheith i láthair iontu, lena n-áirítear Arm Frithbheartaíochta an Tiarna (Lord's Resistance Army) agus de bharr an mhéadaithe atá tagtha ar bhagairtí sceimhlitheoireachta trasnáisiúnta. Spreagann sé cur i bhfeidhm oibríochtúil an Mhisin Tacaíochta Idirnáisiúnta faoi stiúir Afracach chuig Poblacht na hAfraice Láir mar ábhar práinne agus faoi chuimsiú an méid sin, is díol sásaimh dó gur glacadh Rún 2121 (2013) ó Chomhairle Slándála na Náisiún Aontaithe.
3. Meabhraíonn AE an tábhacht a bhaineann leis an bpobal sibhialta a chosaint, agus le cearta an duine agus an dlí daonnúil idirnáisiúnta a urramú. Is ar údaráis Phoblacht na hAfraice Láir atá an phríomhfhreagracht maidir leis an méid sin a chomhlíonadh. Gríosaíonn AE iad chun bearta inbhraite a ghlacadh chun an smacht reachta, an t-ord poiblí agus an tslándáil a athbhunú sa tír ar fad a luaithe is féidir, lena n-áirítear chun a ráthú go gcuirfear gníomhaíocht dhaonnúil chun feidhme gan bhac agus ar bhealach iomlán sábháilte. Leagann sé béim freisin ar an tábhacht a bhaineann le deireadh a chur le gníomhaíochtaí foréigneacha, go háirithe foréigean a dhéantar in aghaidh na leanaí agus na mban, lena n-áirítear foréigean gnéasach, agus le deireadh a chur le saighdiúirí linbh a earcú agus a fhostú. Gríosaíonn AE na húdaráis idirthréimhseacha chun a seacht ndícheall a dhéanamh d'fhonn nach ngearófar an teannais idir comhphobail agus chun tacú leis na tionscnaimh chun é a cheansú. Ní foláir na daoine atá freagrach as sáruithe ar chearta an duine a thabhairt chun cuntais os comhair na cúirte.

4. Athdheimhnióinn AE go bhfuil sé tiomanta do Chomhaontú Libreville an 11 Eanáir 2013 agus do Dhearbhú N'Djamena an 18 Aibreán 2013 atá mar bhonn do réiteach polaitiúil síochánta ar an ngéarchéim i bPoblacht na hAfraice Láir. Iarrann sé ar na húdaráis idirthréimhseacha go léir an próiseas idirthréimhseach a chur i gcrích de mheon macánta agus ar bhealach cuimsitheach go dtí go dtionólfar, faoi am éigin go luath sa bhliain 2015, toghcháin a bheidh i gcomhréir leis na caighdeáin idirnáisiúnta agus a n-athbhunófar an t-ord bunreachtúil mar thoradh orthu.
5. Tá gluaiseacht idirnáisiúnta a bheidh idir láidir, gasta agus comhordaithe de dhíth chun dul i ngleic leis an ngéarchéim shuntasach atá ar fud Phoblacht na hAfraice Láir. Is díol sásaimh do AE na hiarrachtaí a rinne na Náisiúin Aontaithe mar aon leis an gcrúinniú ardleibhéil inar tugadh aghaidh ar an ngéarchéim dhaonnúil i PAL, a tionóladh agus Comhthionól Ginearálta na Náisiún Aontaithe ar siúl an 25 Meán Fómhair i Nua-Eabhrac.
6. Is díol sásaimh do AE freisin gur chruthaigh Comhairle na Náisiún Aontaithe um Chearta an Duine sainordú do shaineolaí neamhspleách ar mhaithe le díriú ar chás chearta an duine i PAL. Spreagann sé údaráis idirthréimhseacha na hAfraice Láir chun obair go hiomlán i gcomhar leis an saineolaí sin.
7. Leanfaidh AE air de chloí leis an ngealltanas cinntitheach a thug sé faoi chuimsiú cur chuige uileghabhálaigh i leith an staid i PAL a chobhsú, lena n-áirítear trí thacaíocht airgeadais a sholáthar don Mhisean Tacaíochta Idirnáisiúnta faoi stiúir Afracach chuig Poblacht na hAfraice Láir. I ndáil leis sin, iarrann an Chomhairle ar an gCoimisiún tús áite a thabhairt d'fhoráil leas a bhaint as an tSaoráid Síochána don Afraic.
8. Tacaíonn AE le gníomhaíocht na Náisiún Aontaithe ar an láthair trí bhíthin Oifig Chomhtháite na Náisiún Aontaithe um Chothú na Síochána i bPoblacht na hAfraice Láir (BINUCA), ar neartaíodh a sainordú le Rún 2121 (2013) chun díriú ar thrí thosaíocht: idirghabháil pholaitiúil agus toghcháin a ullmhú, cearta an duine agus rochtain dhaonnúil.

9. Is é AE an deontóir is mó i bPoblacht na hAfraice Láir. Go háirithe, cuireann sé tacaíocht shuntasach dhaonnúil ar fáil, ar méadaíodh faoi dhó í cheana féin in 2013. Is díol sásaimh don Chomhairle gníomhaíocht dhaonnúil an Aontais ina hiomláine i bhfabhar phobail leochaileacha Phoblacht na hAfraice Láir agus tacaíonn sí go hiomlán leis sin agus lena iarrachtaí chun cabhrú d'fhonn aird a tharraingt ar an ngéarchéim seo. Tá rún daingean ag AE i gcónaí tacú le hiarrachtaí na n-údarás idirthréimhseach d'fhonn an riarachán a athbhunú agus a fheidhmiú rialta agus neamhchlaonta a áirithiú.
10. Leanfaidh AE air de chúnamh forbraíochta a chur ar fáil i PAL, go háirithe chun freastal ar riachtanais an phobail. B'éigean roinnt tionscadal a chur ar fionraí mar gheall ar fhadhbanna slándála agus cuireadh moill ar thionscadail eile nó rinneadh iad a athdhíriú le go gcuirfí an staid mar atá i láthair na huaire san áireamh ar bhealach níos fearr. Rachfar i mbun na dtionscadal ar fad an athuair ar luas níos leanúnaí a luaithe a fhéadfar i bhfianaise cúrsaí slándála sa tír. Díreofar idirghabhálacha comhlántacha leis an bplean oibre idirthréimhseach le linn na hidirthréimhse polaitiúla.
11. Spreagann AE na comhpháirtithe idirnáisiúnta, lena n-áirítear AA, chun breis tacaíochta a thabhairt do Phoblacht na hAfraice Láir agus chun tacú leis na tionscnaimh idirnáisiúnta chun cabhrú leis an bpróiseas idirthréimhseach sa tír.
